

四庫全書

子部

欽定四庫全書

子部

冊府元龜卷五百九十八

詳校官中書臣朱文翰

侍讀臣孫球覆勘

總校官庶吉士臣何思鈞

校對官中書臣朱烜

謄錄監生臣孫祥鳳

欽定四庫全書

冊府元龜卷五百九十七

宋 王欽若等 撰

學校部

總序

古者家有塾黨有庠術有序國有學然則有虞氏之米

廩夏后氏之序商之瞽宗周之類宮皆學也

又云夏曰校商曰序

周曰庠故樂正崇四術立四教順先王詩書禮樂以造士

王太子王子羣后之太子卿大夫元士之適子國之雋

選皆造焉周官小司徒之職師氏掌以三德三行教國子保氏掌養國子以道乃教之六藝又春官大司樂掌成均之法以治建國之學政而合國之子弟大胥掌學士之板以待致諸子小胥掌學士之徵令而比之太師教以六詩六德六律箴師掌教國子舞羽敝箴皆其事也秦置博士掌通古今漢興武帝初置五經博士掌教弟子國有疑事掌承問對本四百石升比六百石初文帝欲廣遊學之路論語孝經孟子爾雅皆置博士至是

遂罷傳記博士平帝元始中立學官郡國曰學縣道邑  
侯國曰校校學置經師一人鄉曰庠聚曰序序庠置孝  
經師一人後漢光武愛好經術立五經博士凡有一十  
四人太常差次總領焉取聰明有威重者一人爲祭酒  
秩六百石建武五年乃脩起大學稽式古典中元元年

初建三雍宮

明堂辟雍  
靈臺也

至明帝親行其禮靈帝光和初

置鴻都門學魏文帝黃初中立太學置春秋穀梁博士  
晉承魏制置博士十九人武帝咸寧四年初立國子學

以教生徒而隸屬太學定置國子祭酒博士各一人助教十五人以教生徒博士皆取履行清淳通明典義者若散騎常侍中書侍郎太子中庶子以上皆得召試元帝初減國子祭酒博士助教爲九人大興中又置周易儀禮公羊博士末年增儀禮春秋公羊博士各一人合爲十一人後又增爲十六人不復分掌五經而謂之太學博士秩六百石孝武太元中損國子助教爲十員宋國子祭酒若不置學則助教唯置一人明帝泰始中以

國學廢初置總明觀真儒文史四科科置學士各十人  
正令史一人書令史二人幹一人門吏一人典觀吏二  
人齊高帝建元中有司奏置國學祭酒准諸曹尚書博  
士准中書郎助教淮南臺御史選經學爲先若其人難  
備給事中以還明經者以本位領其下典學二人三品  
准太常主簿戶曹儀曹各二人五品白簿治禮吏八人  
六品保學醫威儀各二人其夏廢學有司奏省助教以  
下又有總明觀祭酒一人掌治五禮大始六年以國學

廢初置永明三年國學建遂省梁國子祭酒人班第十  
三比列曹尚書又置國子博士二人爲九班助教班第  
二又置大學博士八人班第三又置五經博士各一人  
陳國子祭酒秩中二千石品第三博士品第四秩千石  
國子助教大學博士竝品第八秩六百石律學博士秩  
品亦同後魏道武始建都邑優以經術爲先立太學置  
五經博士太武又別起太學於城東獻祖又立郡學置  
博士二人助教二人後詔大郡立博士二人助教四人



次郡立博士助教各二人中郡立博士一人助教二人  
下郡立博士助教各一人孝文改中書學爲國子學建  
明堂辟雍及遷都雒邑又立國子太學四門學宣武又  
詔營國學樹小學於四門國子祭酒本第四品上後增  
爲從三品國子博士從第五品上後增爲第五品國子  
助教五人從七品大學博士第六品後降爲第七品大  
學助教第八品中四門博士第九品律博士第六品中  
後降爲第九品上比齊國子寺掌訓教胄子祭酒一人

從三品又置功曹五官主簿錄事等員博士五人品第五助教十人太學博士十人從第七品助教二十人從第九品四門博士二十人正九品上亦有助教二十人後周依周禮建六官之職春官太學博士下大夫四命助教及小學博士上士三命皆國子監之屬官也祭酒無聞焉武帝又立露門學隋國子寺開皇中隸太常祭酒一人屬官有功曹主簿錄事各一人統國子太學書算學各置博士國子太學四門各五人書算各二人助

教國子太學四門各五人書筭各二人仁壽初罷國子  
唯置太學煬帝改太學爲國子監初置司業一人丞三  
人唐置國子監祭酒司業之職掌邦國儒學訓導之政  
祭酒一人司業二人屬官有丞主簿錄事府史亭長掌  
固等員國子博士二人掌教文武官三品以上及國公  
子孫從二品以上曾孫之爲生者屬官有助教學生典  
學廟幹掌固等員大學四門亦然大學博士三人掌教  
文武五品以上及郡縣公子孫從三品曾孫之爲生者

四門博士三人掌教文武七品以上及侯伯子男子之  
爲生者若庶人子爲雋士生者國子直講四人掌佐博  
士助教之職專以經術講授而已律學博士一人掌教  
文武官八品以下及庶人子之爲生者以律令爲專業  
格式法例所兼習之屬官有助教學生典學等員書學  
算學亦然書學算學各博士二人並掌教文武官八品  
以下庶人子之爲生者以書算自武德初以國子學隸  
太嘗寺又省國子司業及丞貞觀初改國子寺爲監六

年復置國子司業一人龍朔二年改國子監爲司成館  
祭酒爲大司成司業爲少司成博士爲司成宣業又於  
東都置國子監其學生於兩京教授咸亨初年改司成  
館復爲國子監大司成復爲祭酒少司成復爲司業本  
一員至太極初年加一員光宅初改國子監爲成均監  
祭酒爲成均祭酒長安四年國子監始置直講焉神龍  
初改成均監復爲國子監成均復爲祭酒天寶九年置  
廣文館領國子監進士業者博士助教各一人五代因

之教化之本學校爲先振古以來歷代而下莫不慎擇能者以居其任業專所以世守師嚴然後道尊馳辨彰乎洽聞抗議明乎適變考論章句則析理惟精刊定闕疑則伏膺罔倦因祖述而綴舊學次甲乙而總群綱小道可觀靡不覃究用被國獎實耀儒林若乃自負好勝爭名忌前亦著於篇以示懲艾凡學校十有五門

選任 世業

選任

自漢承秦弊宗尚經術求稽古之士重學官之選歷代而下雖廢置或異而授受之際未嘗輕焉觀其延登鴻碩優隆體貌崇其位著厚其祿廩豈徒冗大官之食重高門之地而已亦將以發揮典籍申明治具顧有益於風教耳非夫大雅宏達博聞彊識究先王之法言蘊專門之素業式可莫二籍甚有聞卽何以稱法師之望恢教授之業敷暢先儒之微旨誘掖方來之雋士以丹青帝載而化民成俗者哉

漢叔孫通薛人秦時以文學待詔博士

張生濟南人受尚書於伏生文帝時爲博士

賈誼雒陽人河南守吳公爲廷尉廼言誼年少頗通諸家之書文帝詔以爲博士

韓嬰燕人推詩人之意而作內外傳數萬言文帝時爲

博士

孫商至武帝亦爲博士

董仲舒廣川人以治春秋景帝時爲博士進退容止非禮不行學士皆師尊之



胡母生字子都齊人治公羊春秋爲景帝博士與董仲舒同業

轅固生齊人以治詩景帝時爲博士

食子公河南人受韓生詩於同郡蔡詎昭帝時爲博士  
長孫順淄川人受韓詩於昌邑王中尉王吉爲博士

韋賢字長孺魯國鄒人篤志於學兼通禮尚書時人號稱鄒魯大儒徵爲博士

嚴彭祖字公子東海下邳人與顏安樂俱事眭孟孟弟

子百餘人唯彭祖安樂爲明繇是公羊春秋有嚴顏之學彭祖爲宣帝博士

施讎字長卿沛人爲童子從田王孫受易王孫爲博士復從卒業宣帝時少府梁丘賀薦讎結髮事師數十年

從結髮爲童子卽從師學著其早也賀不能及詔拜讎爲博士

江公瑕邱人受穀梁春秋及詩於魯申公傳子至孫宣帝時沛人蔡千秋能說穀梁爲郎中戶將會千秋病死徵江公孫爲博士劉向以故諫大夫通達待詔受穀梁

欲令助之

周慶丁姓二人

姓名也

宣帝時待詔保宮

少府屬官也

詔五經

名儒太子太傅蕭望之等大議殿中平公羊穀梁同異慶姓皆爲博士

王式字翁思東平新桃人受詩於免中徐公及許生式爲昌邑王師昌邑廢式得減死歸家後東平唐長賓沛

褚少孫應博士弟子選詣博士摠衣登堂頌禮甚嚴

摠衣

謂以手內舉令離地也

諸博士驚問何師對曰事式皆素聞其賢

共薦之詔除下爲博士

下除官之詔也

張長安字幼君山陽人與唐長賓褚少孫事王式皆爲  
博士繇是魯詩有張唐褚氏之學長安門人陳留許晏  
亦爲博士

殷嘉東海人姚平河東人乘弘

乘姓也音食翰切

河南人受易

於京房成帝時皆爲博士繇是易有京氏之學

士孫張字仲方平陵人受易於五鹿充宗爲博士

孟喜字長卿東海蘭陵人善爲禮春秋授后蒼疏廣世

所傳后氏禮疏氏春秋皆出孟喜喜後舉孝廉爲郎曲

臺署長

曲臺殿名署者主供其事

歐陽生字和伯千乘人受伏生尚書爲博士其子世世相傳至曾孫高子陽爲博士高孫地餘長賓以太子中庶子授太子後爲博士論石渠

林尊字長賓濟南人事歐陽高爲博士論石渠

周堪字少卿齊人與孔霸俱事大夏侯勝霸爲博士堪譯官令論於石渠經爲最高

張山拊字長賓平陵人事小夏侯建爲博士論石渠

后蒼字近君東海郟人事夏侯始昌始昌通五經蒼亦  
通詩禮爲博士

後漢牟長字君高樂安臨濟人少習歐陽尚書不仕王  
莽世光武建武初大司空宋弘特辟拜博士

洼丹洼音圭南陽育陽人也世傳孟氏易學義研深易家

宗之稱爲大儒建武初爲博士

丁恭字子然山陽東緡人

東緡今兗州金鄉縣

習公羊嚴氏春秋

恭學義精明教授嘗數百人州郡請召不應建武初爲  
博士

高詡字季回平原般人世傳魯詩建武初爲符離長去  
官後徵爲博士

李封魏郡人建武初鄭興陳元傳春秋左氏學時尚書  
令韓歆上疏欲爲左氏立博士范升與歆爭之未決陳  
元上書訟左氏遂以封爲左氏博士

張興字君上潁川鄆陵人習梁丘易建武中辟司徒馮

勤府舉孝廉爲博士

張玄字君夏河內河陽人少習春秋顏氏兼通數家建武中舉孝廉爲郎會顏氏博士缺玄試策第一拜爲博士

戴憑字次仲汝南平輿人習京氏易年十六郡舉明經徵博士

伏恭字叔齊瑯琊東武人明齊詩建武中爲劇令青州舉爲尤異太常試經第一拜博士



甄宇字長文北海安丘人習嚴氏春秋教授嘗數百人  
建武中爲州從事徵拜博士

桓榮爲議郎會歐陽尚書博士缺光武欲用榮叩頭讓  
曰臣經術淺薄不如同門生郎中彭闕揚州從事臯弘  
帝曰俞往汝諧

周澤字稚都北海安丘人少事公羊嚴氏春秋建武末  
辟大司馬府署議曹祭酒數月徵試博士

董鈞字文伯犍爲資中人習慶氏禮建武中舉孝廉辟

司徒鈞博通古今數言政事明帝永平初爲博士

魏應字君伯任城人少好學詣博士受業習魯詩明帝

永平初爲博士

李育字元春扶風漆人也

漆縣今幽州  
辛平

少習公羊春秋沉

思專精博覽書傳知名大學章帝建初元年衛尉馬廖

舉育方正爲議郎後拜博士詔與諸儒論五經於白虎

觀

楊倫字仲理陳留東昏人習古文尚書安帝元初中郡

禮請三府竝辟公車徵皆辭疾不就後特徵博士

周防字偉公汝南汝陽人師事徐州刺史蓋豫受古文尚書經明舉孝廉拜郎中撰尚書雜記四十萬言安帝初太尉張禹薦補博士

魏邯鄲淳一名竺字子叔博學有文章文帝初爲五官將博延英儒亦宿聞淳名因啓淳欲使在文學官屬中會臨淄侯植亦求淳太祖遣詣植及文帝卽位以淳爲博士

蘇林字孝友陳留人博學多通古今字指漢末爲五官  
將文學甚見禮待黃初中爲博士帝作典論所稱蘇林  
是也

蜀來敏字敬達義陽新野人涉獵書籍善左氏春秋漢  
末入蜀嘗爲劉璋賓客先主定益州署敏典學校尉

許慈字仁篤南陽人師事劉熙善鄭氏學治易尚書三  
禮毛詩論語漢末自交州入蜀時魏郡胡潛亦在益土  
先主定蜀承喪亂歷紀學業衰廢乃鳩合典籍沙汰衆

學慈潛竝爲博士

尹默字思潛梓潼涪人通諸經史又專精於左氏春秋  
先主定益州領牧以爲勸學從事子宗傳其業爲博士  
晉曹志字允恭魏陳思王植之子少好學以才行稱武  
帝時歷樂平章武趙郡太守咸寧初詔曰甄城公曹志  
篤行履素達學通識宜在儒林以弘胄子之教其以志  
爲散騎常侍國子博士後遷祭酒

杜夷字行齊廬江潛人博覽經籍百家之書靡不畢究

元帝爲丞相教曰今大義顏替禮典無宗朝廷滯義莫能攸正宜特立儒林祭酒官以弘其事處士杜夷棲情遺遠確然絕俗才學精博道行優備其以夷爲祭酒夷辭疾未就又除國子祭酒

謝沉字行思博學多識明練經史康帝卽位朝議七廟迭毀乃以太學博士徵以質疑滯

范弘之字長文安北將軍汪之孫雅正好學以儒術該明孝武時爲太學博士

宋徐廣字野民好學尤精百家數術無不研覽初仕晉孝武帝以廣博學除爲秘書郎校書秘閣增置職僚轉員外散騎侍郎領校書如故

江湛字徽深文帝元嘉末爲左衛將軍時改選學職以太尉江夏王義恭領國子祭酒湛及侍中何攸之領博士

南齊王儉初仕宋爲秘書丞初孝武好文章天下悉以文采相尚莫以專經爲業儉弱年便留心三禮尤善春

秋明帝泰始六年置總明觀於儉宅開學士館以總明四部書充之又詔儉以家爲府及武帝永明三年以丹陽尹領國子祭酒儉子暕暕子承其後皆爲祭酒

張緒字思曼長於周易言精理奧見宗一時高帝建元末初立國子學以緒爲太常卿領國子祭酒武帝時累遷太子詹事永明七年竟陵王子良爲司徒領國子祭酒帝敕王晏曰吾欲令司徒辭祭酒以授張緒物議以爲如何子良竟不拜以緒領國子祭酒



梁孔休源字慶緒齊末舉秀才爲竟陵王西邸學士梁臺建與劉之遴同爲太學博士當時以爲美選

伏暉字玄曜臨海太守曼容之子幼傳父業仕齊爲鄞令高祖天監初兼五經博士與吏部尚書徐勉中書侍郎周捨總知五禮事出爲永陽內史復徵爲國子博士復爲豫章內史徵拜黃門侍郎領國子博士

嚴植之字孝源少精解喪服孝經論語及長遍治鄭氏禮周易毛詩左氏春秋天監二年判後車騎兵叅軍事

四年初置五經博士各開館教授以植之兼五經博士  
六年遷中撫軍記室叅軍猶兼博士

賀瑒字德璉舉明經揚州祭酒俄兼國子助教太學博  
士天監四年初開五館以瑒兼五經博士

明山賓爲治書侍御史右軍記室叅軍掌治吉禮時初  
置五經博士山賓首應其選後以東宮新置學士又以  
山賓居之俄以本官兼國子祭酒

崔靈恩清河武城人遍通五經尤精禮傳初仕後魏爲

太常博士天監十三年歸國高祖重其儒術累遷步兵校尉兼國子博士後爲長沙內史還除國子博士

盧廣范陽涿人少明經有儒術天監中歸國拜國子博士遍講五經尋遷員外散騎常侍博士如故

沈峻字士嵩吳興武康人好學遍遊講肆遂博通五經尤長三禮初爲王國中尉稍遷侍郎竝兼國子助教僕射徐勉奏峻兼五經博士於館講授後爲華容令還除員外散騎侍郎復兼五經博士

孔僉會稽山陰人通五經尤明三禮孝經論語講說竝數十徧歷官國子助教三爲五經博士太清亂卒於家僉子叔玄頗涉文學官至太學博士

陳沈文阿字國衛父峻以文學名於梁氏文阿少習父業研精章句察孝廉爲梁臨川王國侍郎累兼國子助教五經博士文帝時遷通直散騎常侍兼國子博士

鄭灼字茂昭東陽人仕梁爲西省義學士孝元承聖中除通直散騎侍郎兼國子博士高祖世祖之世累遷中

散大夫兼國子博士

沈德威字懷遠梁末遷於天目山篤學無倦遂治經業文帝天嘉初授太學博士轉國子助教每自學還私家講授尋遷太常丞兼五禮學士

顧越字思南說毛詩旁通奧義尤善持論梁末補五經博士敬帝紹泰元年遷國子博士文帝以越篤學厚遇之除給事黃門侍郎又領國子博士

後魏梁越字玄覽博綜經傳無所不通國初以爲禮經

博士道武以其謹厚舉動可則拜上大夫命授諸皇子  
經

李訢爲中書學生聰敏機辨彊記明察初李靈爲文成  
博士諮議崔浩選中書學生器業優者爲助教浩舉其  
弟子箱子與盧度世李敷三人應之給事高謙子祐尚  
書段霸兒姪等以爲浩阿其親戚言於恭宗以浩爲不  
平聞之於太武太武意在於訢曰云何不取幽州刺史  
李崇老翁兒也浩對曰前亦言訢合選但以其先行在

外故不取之太武曰可待訢還箱子等罷之訢爲太武所識如此遂除中書助教博士

張偉字仲業學通諸經太武時與高允俱被辟命拜中書博士

索敞字巨振燉煌人爲劉昞助教專心經籍盡能傳昞之業涼州平入國以儒學見拔爲中書助教博士

平恒字繼叔研綜經籍安貧樂道不以屢空改操徵爲中書博士

穆弼涉獵經史孝文初定氏族欲以弼爲國子助教弼辭曰先臣以來蒙恩累世比較徒流實用慙屈孝文曰朕欲敦厲胄子故屈卿光之白玉投泥豈能相汚弼曰旣遇明時耻沉沉滓

祖瑩范陽人爲中書學生孝文召入令誦五經章句竝陳大義帝嗟賞之瑩出後孝文戲盧景曰昔流共工於幽州北裔之地那得忽有此子景對曰當是才爲世生以才名拜太學博士



劉芳爲通直常侍孝文詔以芳經學精洽超遷國子祭  
酒

董徵字文發頓邱衛人從博陵劉獻之徧受諸經數年  
之中大義精練講授生徒太和末爲四門小學博士

崔景儁梗正有高風好古博涉以經明行修徵拜中書  
博士

北齊李鉉字寶鼎渤海南皮人撰定孝經論語毛詩三  
禮義疏及三傳異同周易義例東魏末舉秀才除太學

博士文宣天保初詔鉉與殿中尚書邢邵中書令魏收等參議禮律仍兼國子博士時詔北平太守宋景業西河太守綦母懷文等草定新歷錄尚書平原王高隆之令鉉與通直常侍房延祐國子博士刁柔叅考得失尋正國子博士

刁柔字子溫渤海人綜習經史尤留心禮儀高祖令教授諸子文宣天保初除國子祭酒博士

張買奴平原人經義該博諸儒咸推重之歷太學博士

邢峙字士峻河南鄭人通三禮左氏春秋天保初郡舉孝廉授四門博士遷國子助教又拜國子博士

張雕中山北平人徧通五經尤明三傳廢帝乾明初除國子博士琅琊王儼求博士精儒學有司以雕應選時號得人累遷國子祭酒

馬敬德河間人少好儒術留意於春秋左氏舉秀才中第乃請試經業問十條竝通擢授國子助教遷太學博士後主天統初除國子博士武平初拜國子祭酒

孫靈暉長樂武彊人舉秀才射策高第後以儒術甄明擢授太學博士累遷潼郡太守天統中勅令朝臣推舉可爲南陽王綽師者吏部尚書尉瑾表薦之徵爲國子博士授南陽王經

劉軌思渤海人說詩甚精天統中任國子博士

鮑季詳渤海人甚明禮兼通左氏春秋諸儒稱之天統中爲太學博士

張思伯河間樂城人善說左氏亦治毛詩章句以二經

教齊安王廓武平初拜國子博士

後周沈重字德厚吳興武康人專心儒術博覽群書尤明詩禮及左氏春秋初仕梁高祖高祖置學官以崇儒教中大通四年乃革選以重補國子助教大同二年除五經博士

盧誕仕西魏爲散騎常侍太祖以誕儒宗學府爲當世所推乃拜國子祭酒

薛慎爲太祖丞相府墨曹叅軍太祖於行臺省置學取

丞郎及府佐德行明敏者充生悉令旦理公務晚就講習先大經後子史又於諸生中簡德行純慤者侍讀書慎與隴西李伯良辛韶武功蘓衡譙郡夏侯裕安定梁曠梁禮河東裴舉薛同滎陽鄭朝等十二人竝應其選又以慎爲學師以知儒生課業

樊深字文深講習五經晝夜不倦太祖置學於東館教諸將子弟以深爲博士深經學通贍儒者推其博物後除國子博士六官建拜太學助教遷博士

蕭撝字智遐博觀經史雅好屬文武帝時爲上州刺史及入朝屬置露門學帝以撝與唐瑾元偉王褒等四人俱爲文學博士

熊安生字植之博通五經專以三禮教授北齊河清中陽休之奏爲國子博士武帝入鄴令隨駕入朝至京勅令於大乘佛寺叅議五禮宣政元年拜露門博士下大夫

樂遜字遵賢西魏廢帝二年太祖召遜教授諸子講孝

經論語毛詩及服虔所注春秋左氏傳授太學助教閔  
帝元年治太學博士轉治小師氏下大夫宣帝大象中  
又爲露門博士

隋房暉遠字崇儒常山真定人治三禮春秋三傳詩書  
周易嘗以教授爲務北齊南陽王綽爲定州刺史聞其  
名召爲博士周武帝平齊搜訪儒俊暉遠首應辟命授  
小學下士及高祖受禪太常卿牛弘每稱爲五經庫吏  
部尚書韋世康薦之遷太學博士後爲國子博士



王頰初仕後周武帝引爲露門學士每有議決多頰所爲高祖開皇初授著作佐郎於國子講授會高祖親臨釋奠祭酒元善講孝經頰與相論難詞義鋒起善往往見屈高祖大奇之超授國子博士

馬光字榮伯武安人尤明三禮爲儒者所宗開皇初高祖徵山東義學之士光與張仲讓孔籠竇士榮張黑奴劉祖仁等俱至竝授太學博士時人號爲六儒

褚輝字高明吳郡人以三禮學稱於江南煬帝時徵天

下儒術之士悉集內史省相次講論輝博辨無能屈者  
於是擢爲太學博士

唐徐文遠雒州偃師人博覽五經尤精左傳隋開皇中  
累遷太學博士大業初擢授國子博士時人稱文遠之  
左氏爲一時之最

陸德明蘓州人陳宣帝大建中大徵四方名儒講于承  
光殿德明年弱冠往預焉後帝禎明中爲國子助教煬  
帝嗣位以爲秘書學士大業中廣召明經之士四方至

者甚衆遣德明與魯達孔褒俱會門下省共相駁難無出其右者授爲國子助教高祖武德中補太學博士太宗貞觀中拜國子博士

孔穎達字仲達冀州衡水人隋大業初舉明經高第授河內郡博士煬帝徵諸郡儒官集於東都令國子秘書學士與之論難穎達爲最補太學助教太宗在藩引爲秦府文學館學士及卽位擢授國子博士貞觀六年累除國子司業歲餘遷太子右庶子仍兼國子司業與諸

儒議歷及明堂皆從穎達之說十二年拜國子祭酒

司馬才章魏州貴鄉人父烜博涉五經善緯候才章少  
傳其業隋末爲郡博士貞觀初太宗謂侍臣曰隋末學  
者凋喪儒教凌遲唯陸德明徐文遠爲儒玄奘與二三  
年間相次殂歿豈有後進之士經業優洽而未深用者  
乎因徵才章及王琰王恭俱拜爲博士

才章爲國子助教  
王恭爲太學

博士

蓋文懿貝州宗城人武德初爲國子助教時高祖別於

秘書省置學教授王公之子以文懿爲博士貞觀中除  
國子博士

許叔牙少精于毛詩禮記尤善諷詠貞觀初累授晉府  
叅軍兼侍王讀書字遷太子洗馬兼崇賢館學士仍兼  
侍讀

馬嘉運繁水人專精儒業貞觀十一年召拜太學博士  
弘文館學士

羅道綜少爲太學生勤於學業高宗末爲太學博士

褚無量字弘度杭州鹽官人尤精三禮及史記中宗朝累除國子博士遷司業兼脩文館學士以母老請停官歸侍玄宗在東宮召拜國子司業兼皇太子侍讀及卽位兼遷國子祭酒

歸崇敬字正禮蕪州吳人天寶初以經業擢第調授四門助教轉博士司業德宗建中初又拜國子司業

馮伉京兆人少有經學累登五經秀才及博士三史科德宗貞元中爲皇太子及諸王侍讀憲宗元和初拜國

子祭酒後爲散騎常侍復領太學

史廻文宗太和初爲四門館助教四年閏十二月國子  
監以廻及處士成子野蓋繇庚梁德方前越州叅軍疆  
嘉徵等皆通經術准長慶元年赦書節文得以薦聞請  
勅所在州府給將服許傳遞至都與太學諸生講訖仍  
乞委中書門下更加搜訪如有此比准徵赴廷從之

周田敏初仕漢乾祐中爲戶部侍郎兼國子祭酒時桑  
維翰執政時或有不悅敏者言未有學官兼丞郎者又

言敏長于經義唯學官最稱職維翰乃去戶部侍郎祇  
爲祭酒加檢校右僕射尋而復除右丞兼判國學

世業

自夫子之以詩禮授伯魚而有趨庭之訓其後漢武表  
章六經始立博士開弟子員設科射策勸以官祿學者  
寔盛蓋獲利之使然爾故有父子講習以著專門之稱  
世家祖述以成傳業之美莫不達章句之要精詁訓之  
說克纘前緒見推當時以至歷世祚之遐邇不墜其素



風誨生徒以蕃熾益廣乎遺教名家獨出蔚爲儒宗稽  
古擅譽以階榮爵蓋韋賢有言斤籩金之非寶夏侯立  
論謂朱紫之可捨斯不誣矣

漢孔光字子夏孔子十四世之孫孔子生伯魚鯉

名鯉字伯

魚先言其字者孔氏自爲譜系示尊其先也

鯉生子思伋伋生子上白白生

子家求求生子真箕箕生子高穿穿生順順爲魏相順  
生鮒鮒爲陳涉博士死陳下鮒弟襄爲孝惠博士長沙  
太傅襄生忠忠生武及安國武生延年延年生霸字次

儒霸生光焉安國延年皆以治尚書爲武帝博士安國  
至臨淮太守霸亦治尚書光位至丞相

士孫張字仲方受易於五鹿充宗官至給事中家世傳  
業

兒寬受尚書於孔安國而歐陽大小夏侯氏學皆出於  
寬寬授歐陽生子世世相傳至曾孫高子陽爲博士

高名

字子陽高孫地餘長賓以太子中庶子授太子後爲博士

論石渠地餘少子政爲王莽講學大夫繇是尚書世有

歐陽氏學寬位至御史大夫

韓嬰孫商為博士宣帝時涿郡韓生其後也以易徵待  
詔殿中曰所受易即先太傅所傳也嘗受韓詩不如韓  
氏易深

滿昌字君都通詩禮為詹事家世傳業

瑕丘江公受穀梁春秋及詩於魯申公傳至子孫為博  
士

徐良字遊卿受大戴禮為博士家世傳業

夏侯勝其先夏侯都尉從濟南張生受尚書以傳族子始昌始昌傳勝勝又事同郡簡卿兒寬門人勝傳從兄子建繇是尚書有大小夏侯之學勝位至太子太傅

橋仁字季卿受小戴禮爲大鴻臚家世傳業

韋賢治詩事大江公及許生

大江公卽瑕丘江公也

又治禮至丞

相傳子玄成以淮陽中尉論石渠後亦至丞相玄成及兄子賞以詩授哀帝繇是魯詩有韋氏學

王中受嚴彭祖春秋爲元帝少府家世傳業

尹更始授左氏傳取其變理合者以爲章句傳子咸官  
至諫大夫長樂戶將

劉向爲中壘校尉子歆爲黃門郎河平中受詔領校秘  
書哀帝初卽位大司馬王莽舉歆宗室有才行爲侍中  
大夫遷騎都尉奉車光祿大夫幸貴復領五經卒父前  
業

後漢洼丹世傳孟氏易建武初爲博士

高詡曾祖父嘉以魯詩授元帝仕至上谷太守父容少

傳家學哀平間爲光祿大夫詡以父任爲郎中世傳魯詩徵爲博士

耿況以明經爲郎子弇少好學習父業

袁山松書曰弇少學詩禮明銳

有權謀

曹褒字叔通父充治慶氏禮

慶普字孝公爲東平太傅受禮于后蒼號慶氏禮

建武中爲博士褒少篤志有大度結髮傳充業博雅疏通尤好禮事褒位至侍中

徐防祖父宣爲講學大夫以易教授王莽父憲亦傳宣

業防少習父祖學位至太尉

鄧甫德爲開封令學傳父業

陳元父欽習左氏春秋王莽從欽受學以欽爲厭難將軍元少傳父業爲之詁訓銳精覃思至不與鄉里通

歐陽歙自歐陽生傳伏生尚書至歙八世皆爲博士

伏湛字惠公琅琊東武人九世祖勝字子賤所謂濟南伏生也湛父理爲當世名儒以詩授成帝爲高密太傅

別自名學

爲高密王寬傳也寬武帝玄孫廣陵王昏後也

湛性孝友少傳父業

教授數百人成帝時以父任爲博士弟子初自伏生以  
後世傳經業湛子翁翁子光光子辰辰子無忌無忌亦  
傳家學博物多識順帝時爲侍中永和元年詔無忌與

議郎黃景校定中書五經諸子百家藝術

中書內中之書也

桓榮受朱普學章句四十萬言浮辭繁長多過其實及  
榮入授顯宗減爲二十三萬言榮子郁復刪省定成十  
二萬言繇是有桓君大小太常章句郁敦厚篤學傳父  
業以尚書教授門徒有數百人郁中子馮能傳其家學



焉孫典字公雅復傳其家業以尚書教授潁川門徒至

數百人

一云伏氏自東西京相襲爲名儒以取爵位而桓氏尤盛自榮至典而世宗其道父子兄弟代

作帝師受其業者皆至卿相顯于當時

榮位至太常少卿

鮑永少有志操習歐陽尚書子昱少傳父學客授於東平永位終兗州牧

劉軼字君文父昆受施氏易於沛人戴賓教授弟子嘗五百餘人軼傳父業門徒亦盛位至宗正

鄭衆字仲師從父授左氏春秋子安世亦傳家業爲長

樂未央廐令

伏黯以明齊詩改定章句作解說九篇位至光祿勳子  
恭少傳黯學除劇令舉尤異太常試經第一拜博士以  
父章句繁多乃省減繁辭定爲二十萬言

薛漢世習韓詩父子以章句著名漢少傳父業教授嘗  
數百人建武初爲博士當世言詩者推漢爲長

袁安祖父良習孟氏易安少傳良學安子敞及京亦傳  
易經教授京作難記三十萬言京子彭字伯楚少傳父

業彭弟湯字仲和亦傳家學諸儒稱其節多歷顯位安  
位至太尉

甄宇習嚴氏春秋教授嘗數百人位至太子少傅傳業  
子普普傳子承承講授嘗數百人子孫傳學不絕

劉丕博學號爲通儒子寵少受父業以明經舉孝廉

李邵字孟節漢中南鄭人父頡以儒學稱官至博士邵  
習父業遊太學通五經善河雒風星當世稱之

宋意字伯志父京以大夏侯尚書教授至遼東太守意

少傳父業

楊震字伯起少好學受歐陽尚書於太常桓郁震中子  
秉字叔節少傳父業兼明京氏易博通書傳嘗隱居教  
授秉子賜字伯獻亦傳家學篤志博聞嘗退居隱約教  
授門徒震少子奉奉子敷敷志博聞議者以爲能世其  
家敷早卒子衆亦傳先業震位至太尉

孔奮少從劉歆受春秋左氏傳弟竒博通經典作春秋

左氏刪刪定其義也奮晚有子嘉官至城門校尉作左氏說

云說猶今  
之疏也

牟長習歐陽尚書爲博士子紆又以隱居教授門生千  
人

曹曾從歐陽欵受尚書門徒三千人位至諫議大夫子  
祉河南尹傳父業教授

崔駟通詩易春秋子瑗字子玉早孤銳志好學盡能傳  
其父業年十八至京師從侍中賈逵質正大義逵善待  
之竇憲爲車騎將軍辟駟爲掾

賈逵父徽習左氏春秋兼習國語周官又受古文尚書於塗暉學毛詩於謝曼卿逵悉傳父業弱冠能誦左氏傳及五經本文以大夏侯尚書教授雖爲古學兼通五家穀梁之說自爲兒童嘗遊太學不通人間事位至侍中

楊統曾祖父仲續代修儒學以夏侯尚書相傳

郎顛父宗學京氏易能望氣占候顛少傳父業後拜郎中辭不就

翟圃四世傳詩圃好老子尤善圖緯天文歷算位至將  
作大匠

張圃少從祖父充受尚書能傳其業又事太常桓榮勤  
力不怠聚徒以百數位至太尉

孔僖二子長彥好章句學季彥守其家業門徒數百人  
僖官至臨晉令

馬日磾字翁叔馬融之族子少傳融業以才學進與楊  
彪盧植蔡邕等典校中書歷位九卿遂登台鼎

蜀許慈字仁篤治易尚書三禮毛詩論語子勛傳其業  
復爲博士

尹默字思潛從司馬德操宋仲子等受古學皆通諸經  
史子宗傳其業爲博士

吳虞翻太嘗時爲騎都尉翻初立易注奏上曰臣聞六  
經之始莫大陰陽是以伏羲仰天懸象而建八卦觀變  
動六爻爲六十四以通神明以類萬物臣高祖父故零  
陵太守光治孟氏易曾祖父故平輿令成續述其業至



臣祖父鳳爲之最密臣亡考故日南太守歆受本於鳳  
最有故書世傳其業至臣五世

晉王愆期父接官至征虜將軍嘗注公羊又撰列女後  
傳愆期流寓江南緣父本意更注公羊又集列女後傳  
云

范宣尤善三禮嘗以講誦爲業子輯亦以講授爲事宣  
以太學博士散騎郎竝徵不就

宋杜坦祖預注春秋左氏傳坦與弟驥傳其家業坦位

至左將軍

南齊裴昭明河東聞喜人祖松宋太中大夫父駟南中  
郎叅軍昭明少傳儒史之學爲太學博士

梁明山賓爲國子博士卒其子興道亦傳父業歷官太  
學博士

褚脩父仲都善周易天監中脩歷官五經博士脩少傳  
父業兼通孝經論語

范縝字子真尤精三禮爲中書郎國子博士卒官子胥

字長才傳父學起家太學博士

賀瑒字德璉會稽山陰人祖道立善三禮爲尚書三公  
郎建康令瑒少傳家業爲五經博士子革字文明少通  
三禮及長徧治孝經論語毛詩左傳

賀琛伯父瑒爲世碩儒授經於琛高祖聞琛學術召見  
文德殿與語悅之謂僕射徐勉曰琛殊有世業仍補王  
國侍郎俄兼太學博士

孔僉通五經尤明三禮歷官國子助教三爲五經博士

子叔玄頗涉文學官至太學博士僉兄子元素又善三禮有盛名

司馬筠字貞素博通經術尤明三禮累加左丞出爲始興內史卒官子壽傳父業亦明三禮歷官尚書祠部郎出爲曲阿令

沈峻爲五經博士卒子文阿傳父業尤明左氏傳太清中自國子助教爲五經博士

陳杜之偉字子大吳郡錢塘人家世儒學以三禮專門

父規梁奉朝請之偉有逸才七歲受尚書稍習詩禮畧通其學十五遍觀文史儀禮故事時輩嘉其早成累遷太中大夫

顧越字思南吳郡鹽官人所居新坡黃垆世有鄉校繇是顧氏多儒學焉越少孤以勤苦自立說毛詩旁通異義梁世補五經博士

賀德基字承業世傳禮學祖文發父淹仕梁俱爲祠部郎竝有名當世德基於禮記稱爲精明居以傳授累遷

尚書祠部郎德基雖不至大官而三世儒學俱爲祠部  
時論美其不墜焉

後魏李曾少治鄭氏禮左氏春秋以教授爲業三辟功  
曹竝不就子孝伯少傳父業博綜群言孝伯兄祥字元  
善學傳家業鄉黨宗之

江式字法安陳留濟陽人六世祖瓊字孟瑀晉馮翊太  
守善垂篆詁訓永嘉大亂瓊棄官西投張軌子孫因居  
涼土世傳家業祖彊字文威後魏太延五年涼州平內

徙代京上書三十條各有體例又獻經史諸子千餘卷  
繇是擢拜中書博士式少傳家學兼著作郎

劉獻之饒陽人善春秋毛詩每講左氏盡隱公八年便  
止云義例已了不復須解孝文幸中山詔徵典內校書  
固以疾辭四子放古爰古參古修古竝傳父詩

北齊馬敬德河間人少好儒術負笈隨大儒徐遵明學  
詩禮畧通大義遂留意於春秋左氏爲諸儒所稱累授  
助教博士侍講東宮子元熙字長明傳父業兼事文藻

累遷散騎侍郎待詔文林館後主武平中皇太子將講  
孝經有司請擇師友帝曰馬元熙朕師之子可令教兒  
儒者榮其世載

顏之推字子介琅琊臨沂人父勰世善周官左氏梁湘  
東王諮議參軍之推早傳家業博覽群書無不該遍湘  
東以爲國左常侍

後周盧辨字景宣范陽涿人累世文學父靖太常丞辨  
少好學博通經術舉茂才爲太學博士以大戴禮未有



解詁辨乃注之其兄景裕爲當世碩儒謂辨曰昔侍中注小戴今爾注大戴庶纂前脩矣

隋包愷字和樂東海人其兄愉明五經愷悉傳其業爲國子助教

庾季才爲太史中大夫藝術精通子質復爲太史令質子儉亦傳父業兼有學識

唐顏籀字師古琅琊臨沂人祖之推仕北齊爲黃門侍郎有盛名父思魯少以學業稱武德初爲秦府記室參

軍事師古少傳家業博學羣言多所詳練尤精詁訓善屬文累遷秘書監弘文館學士卒

許孟容京兆長安人父鳴謙究通易象官至撫州刺史孟容少以文詞知名舉進士後究王氏易登科授秘書省校書郎

蔣乂字德源祖環太子洗馬開元初弘文館學士父蔣明累遷國子司業集賢殿學士代爲名儒乂史官吳兢之離孫幼便記覽弱冠博通群籍史才尤長宰相張益

見而奇之署集賢小職

冊府元龜卷五百九十七

欽定四庫全書

冊府元龜卷五百九十八 宋 王欽若等 撰

學校部

教授

自仲尼反魯刪定六藝然後學有所宗儒術以之振矣  
雖復哲人其萎微言遂絕而違者斯衆傳授寔廣漢氏  
而下師訓彌盛素業所守乃專門而靡雜稟教殊指或  
名家而別出岐分派散增華竝驚蓋有爵位通顯譽望

克治風詠推美山林傾慕徒衆輻輳不遠乎千里名籍  
包舉或踰於萬數以至肥遯求志杜門却掃其於傳道  
誨人未嘗倦也茲所謂拳拳服膺循循善誘達教學之  
旨爲立門之駕說者焉

卜商字子夏衛人孔子旣没居西河教授爲魏文侯師  
澹臺滅明事孔子旣已受業南遊至江從弟子三百人  
設取予去就名施於諸侯

商瞿字子木魯人受易孔子

商瞿姓也  
瞿音衛

以授子庸

姓橋  
名庇

字子庸庇  
音必寐反

子庸授江東馭臂子弓

馭姓也  
音韓

子弓授燕周

醜子家子家授東武孫虞子乘子乘授齊田何子裝及

秦禁學易爲筮卜之書漢獨不禁故傳授者不絕

漢田何以齊田徙杜陵號杜田生

高祖用婁敬之言徙  
關東大族故何以舊

齊田氏見徙時未爲杜陵  
蓋史家本其地追言也

授東武王同子中雒陽周王

孫丁寬齊服生皆著易傳數篇

田生授王同周王孫丁  
寬服生四人而四人皆

著易傳也子中王  
同字也中讀曰仲

同授淄川楊何字叔元元光中徵爲

太中大夫齊即墨成至城陽相

姓即墨  
名成

廣川孟但爲太

子門大夫魯周霸莒衡胡

莒人姓衡名胡也

臨淄主父偃皆以

易至大官要言易者本之田何

丁姓字子孫從魯榮廣受詩春秋爲中山傅

申章昌字曼君楚人

申章姓

從丁姓受學爲長沙太傅

丁寬字子襄梁人從田何受易授同郡碭田王孫王孫授施讎孟喜梁丘賀繇是易有施孟梁丘之學寬景帝時爲梁孝王將軍

王臧蘭陵人從魯申公受詩已通事景帝爲太子少傅



施讎字長卿沛人沛與碭相近讎爲童子從田王孫受  
易後讎從徙長陵田王孫爲博士復從卒業與孟喜梁  
邱賀竝爲門人謙讓嘗稱學廢不教授及梁邱賀爲少  
府事多乃遣子臨分將門人張禹等從讎問讎自匿不  
肯見賀固請不得已乃授臨等於是賀薦讎結髮事師  
數十年從結髮爲童子卽  
從師學著其早也賀不能及詔拜讎爲博士讎  
授張禹琅琊魯伯伯爲會稽太守禹至丞相授淮陽彭  
宣沛戴崇子平崇爲九卿宣大司空禹宣皆有傳魯伯

授太山毛莫如少路

姓毛名莫如字少路

琅琊郡丹曼容著清名

莫如常山守此其知名者也繇是施家有張彭之學

孟喜字長卿東海蘭陵人也父號孟卿

時人以卿呼之若言公也

善

爲禮春秋授后蒼疏廣世所傳后氏禮疏氏春秋皆出

孟卿孟卿以禮經多春秋煩雜乃使喜從田王孫受易

喜授同郡白光少子沛翟牧子兄

兄讀曰况

皆爲博士繇是

有瞿孟白之學

梁丘賀字長翁琅琊諸人也以能心計爲武騎從太中

大夫京房受易房淄川楊何弟子也

自別一京房非焦延壽弟子爲課吏

法者或書字誤耳不當爲京房

房出爲齊郡太守賀更事田王孫賀傳

子臨亦入說爲黃門郎甘露中奉使問諸儒於石渠臨學精熟專行京房法琅琊王吉通五經聞臨說喜之時帝選高才郎十人從臨講吉乃使其子郎中駿上疏從

臨受易五鹿充宗授平陵士孫張仲方

士孫姓張名仲方字

沛鄧

彭祖子夏齊衡咸長賓張爲博士至揚州牧家世傳業

彭祖真定太傅咸王莽講學大夫繇是梁丘有士孫鄧

衡之學

京房受易梁人焦延壽

延壽其字名贛

延壽云嘗從孟喜問易

會喜死房以爲延壽易卽孟氏學翟牧白生不肯皆曰

非也至成帝時劉向校書考易說以諸易家說皆祖田

何楊叔丁將軍大詔畧同惟京氏爲異黨焦延壽獨得

隱士之說

黨讀曰儻

託之孟氏不相與同房授東海殷嘉河

東姚平河南乘弘

乘姓也音食證反

皆爲郎博士繇是易有京

氏之學位至魏郡太守

費直東萊人也

費扶味反

治易爲郎長於卦筮亡章句徒以

彖象繫辭十篇解說上下經琅琊王璜能傳之

伏生名勝濟南人爲秦博士孝文時求能治尚書者天

下亡有聞伏生治之欲召時伏生年九十餘老不能行

於是詔太常使掌故朝錯往受之

衛宏定古文尚書序云生老不能正言不

可曉也使其女傳言教錯齊人語多與潁川異錯所不知者凡十二三畧以其意屬讀而已

秦時禁

書伏生壁藏之其後大兵起流亡漢定伏生求其書亡

數十篇獨得二十九篇卽以教於齊魯之間齊學者繇

此頗能言尚書山東大師亡不涉尚書以教伏生教濟南張生及歐陽生是後魯周霸雒陽賈嘉頗能言尚書

嘉者賈說之孫也

孔安國有孔氏古文尚書以今文字讀之因以起其家逸書得十餘篇尚書茲多於是遭巫蠱未立於學官安

國爲諫大夫授都尉朝

朝名都尉姓

而司馬遷亦從安國問

故遷書載堯典禹貢洪範微子金縢諸篇多古文說都

尉朝授膠東庸生庸生授清河胡嘗少子

少子嘗字

歐陽生字和伯千乘人也事伏生授兒寬寬又授業孔安國歐陽大小夏侯氏學皆出於寬寬授歐陽生子世世相傳至曾孫高爲博士繇是尚書世有歐陽氏學

林尊字長賓濟南人也事歐陽高爲博士授平陵平當梁陳翁生翁生家世傳業繇是歐陽有平陳之學翁生授琅琊殷崇楚國龔勝而平當授九江朱普公文上黨鮑宣宣爲司隸校尉徒衆尤盛知名者也

高相沛人也治易與費公同時其學亦亡章句專說陰

陽災異自言出於丁將軍傳至相相授子康及蘭陵母將永康以明易爲郎永至豫章都尉

夏侯勝其先夏侯都尉從濟南張生受尚書以傳族子

始昌始昌傳勝勝又事同郡簡卿

簡音姦

簡卿者倪寬門

人勝傳從兄子建又事歐陽高繇是尚書有大小夏侯之學建位至太子太傅

周堪字少卿齊人也與孔霸俱事大夏侯勝堪授率卿及長安許商字長伯率卿爲博士霸以帝師賜爵號褒



成君傳子光亦事牟卿繇是大夏侯有孔許之學堪位  
至光祿勳

張山拊字長賓平陵人也

拊音膚

事小夏侯建爲博士授

同縣李尋鄭寬中少君山陽張無故子儒信都秦恭延  
君陳留假蒼子驕無故善脩章句小夏侯說文恭增師

法至百萬言

言小夏侯本所說之文不多而秦恭又增益故至百萬言也

申公名培魯人也少與楚元王交俱事齊人浮丘伯受  
詩漢興高祖過魯申公以弟子從師入見於魯南宮呂

太后時浮丘伯在長安楚元王遣子郢與申公俱卒學

郢卽郢客也

元王薨郢嗣位立爲楚王令申公傳太子戊

不好學病申公

病苦也

及戊立爲王胥靡申公

胥靡相係而作役

申公愧之歸魯退居家教終身不出門復謝賓客

身旣不出

門非受業弟子其他賓客來者又謝遣之不相見也

獨王命召之乃往弟子自遠

至受業者千餘人申公獨以詩經爲訓故以教亡傳

其說

指不爲解說之傳

疑者則闕弗傳蘭陵王臧從受詩申公弟子

以百數申公以詩春秋授而瑕邱江公盡能傳之及魯

許生免中徐公

免中邑名也

皆守學教授

韋賢治詩事大江公及許生

大江公卽瑕邱江公也以異下博士江公故稱大

又治禮傳子玄成及兄子賞以詩授哀帝繇是魯詩有

韋氏學

王式東平新桃人事免中徐公及許生式爲昌邑王師

山陽張長安

長安名也

先事式後東平唐長賓沛褚少孫亦

來事式張生唐生褚生皆爲博士繇是魯詩有張唐褚

氏學

張生兄子游卿爲諫大夫以詩授元帝其門人琅琊王扶陳留許晏繇是張家有許氏學初薛廣德亦事王式以博士論石渠授龔舍

轅固齊人也以治詩孝景時爲博士諸齊以詩顯貴皆固之弟子也昌邑太傅夏侯始昌最知名

后蒼字近君東海郟人也事夏侯始昌通五經蒼亦通詩禮授翼奉蕭望之匡衡授琅琊師丹伏理旂君頴川滿昌君都君都爲詹事治高密太傅家世傳業繇是

齊詩有翼匡師伏之學滿昌授九江張邨琅琊皮容皆至大官徒衆尤盛蒼說禮數萬言號曰后氏曲臺記授沛聞人通漢子方

開人姓也名通漢字子方也

梁戴德延君戴聖次

君沛慶普孝公德號大戴聖號小戴繇是禮有大戴小戴慶氏之學普授魯夏侯敬又傳族子咸大戴授琅琊徐良游卿家世傳業小戴授梁人橋仁季卿楊榮子孫

子孫榮之字也

家世傳業繇是大戴有徐氏小戴有橋楊氏之

學蒼官至少府

韓嬰燕人也景帝時爲常山王太傅韓生推詩人之意而爲內外傳數萬言其語頗與齊魯間殊然其歸一也

淮南賁生受之

賁音肥

自是之後而趙燕間言詩者繇韓

生韓生孫商爲武帝博士孝宣時涿郡韓生其後也以易徵待詔殿中曰所受易卽先太傅所傳也嘗受韓詩不如韓氏易深太傅故專傳之司隸校尉蓋寬饒本受易於孟喜聞涿韓生說易而好之卽更從受焉

趙子河內人也

王欽若等曰趙子史不載其名

事燕韓生授同郡蔡誼

設授同郡食子公與王吉食生授太山栗豐吉授淄川  
長孫順繇是韓詩有王食長孫之學豐授山陽張就東  
海髮福福皆至大官徒衆尤盛

毛公趙人也治詩爲河間獻王博士授同國貫長卿長  
卿授解延年延年授徐敖教授九江陳俠繇是言毛詩  
者本之徐敖

胡母生字子都齊人也治公羊春秋爲景帝博士與董  
仲舒同業仲舒著書稱其德年老歸教於齊齊之言春

秋者宗事之公孫弘亦頗受焉而董生爲江都相弟子

遂之者蘭陵褚大東平嬴公廣川段仲溫呂步舒

遂謂名位

成達者

大至梁相步舒丞相長史唯嬴公守學不失師法

爲昭帝諫大夫授東海孟卿魯睦孟孟爲符節令坐說

災異誅

嚴彭祖字公子東海下邳人也與顏安樂俱事睦孟孟

弟子百餘人唯彭祖安樂爲明質問疑誼各持所見孟

曰春秋之意在二子矣孟死彭祖安樂各顯門教授

顯與



專同門言 繇是公羊春秋有嚴顏之學彭祖授琅琊王  
各自名家

中爲元帝少府

中讀爲仲

家世傳業中授同郡公孫文東門

雲

顏安樂字公孫魯國薛人眭孟姊子也安樂授淮陽泠

豐次君

泠音零

淄川任公繇是顏家有泠任之學始貢禹

事嬴公成於眭孟疏廣事孟卿廣授琅琊筦路

筦亦管字也

禹授穎川堂谿惠

姓堂谿也

惠授太山冥都都與路又事顏

安樂故顏氏復有筦冥之學路授孫實爲大司農豐授

馬宮琅琊左咸徒衆尤盛官至齊郡太守丞

瑕邱江公受穀梁春秋及詩於魯申公傳子至孫爲博

士武帝時江公與董仲舒竝仲舒通五經能持論善屬

文江公呐於口

屬之欲切  
呐古訥字

上使與仲舒議不如仲舒而

丞相公孫弘本爲公羊學比輯其議卒用董生

比次也  
輯合也

比類寐反  
輯與集同

於是上因尊公羊家詔太子受公羊春秋繇

是公羊大興太子旣通復私問穀梁而善之其後浸微

浸漸也

唯魯榮廣王孫皓星公二人受焉廣能盡傳其詩

春秋高才捷敏與公羊大師眭孟等論數困之

孟等窮屈也

故好學者頗復授穀梁沛蔡千秋少君梁周慶幼君丁

姓子孫

姓丁名姓字子孫

皆從廣受千秋又事皓星公爲學最

篤千秋宣帝時說穀梁上善穀梁說擢千秋爲諫大夫  
給事中後有過左遷平陵令復求能爲穀梁者莫及千  
秋上愍其學且絕乃以千秋爲郎中戶將選郎十人從  
受汝南尹更始翁君本事千秋會千秋病死徵江公孫  
爲博士劉向以故諫大夫通達待詔受穀梁欲令助之

江博士復死乃徵周慶丁姓待詔保宮

保宮少府之屬官也本名居室

使卒授十人自元康中始講至甘露元年積十餘歲皆

明習乃召五經名儒太子太傅蕭望之等大議殿中平

公羊穀梁同異各以經處是非時公羊博士嚴彭祖侍

郎申輓

輓音晚

伊推宋顯穀梁議郎尹更始待詔劉向周

慶丁姓竝論公羊家多不見從願請內侍郎許廣使者

亦竝內穀梁家中郎王亥各五人

使者謂當時詔遣監議者也內謂引入議

所也公羊家既請內許廣而使者因竝內王亥也

議三十餘事望之等十一人

各以經說對多從穀梁繇是穀梁之學大盛慶姓皆爲

博士

周慶丁姓  
二人也

姓授楚申章昌曼君

姓申章名  
昌字曼君

尹更始

又受左氏傳取其變理合者以爲章句傳子咸及翟方  
進琅琊房鳳

朱雲爲槐里令後不仕居鄆田教授擇諸生然後爲弟  
子九江嚴望及望兄子元子仲能傳雲學皆爲博士

房鳳字子元不其人也

琅琊之縣  
也其音基

爲五官中郎將時光

祿勳王龔以外屬內卿

邛成太后兄也  
內卿光祿勳治宮中

與奉車都尉

劉歆共校書三人皆侍中歆曰左氏春秋可立哀帝納之以問諸儒皆不對歆於是數見丞相孔光爲言左氏以求助先卒不肯唯鳳龔許歆遂共移書責讓太常博士大司空師丹奏歆非毀先帝所立上於是以龔等補吏龔爲弘農歆河內鳳九江太守始江博士授胡嘗嘗授梁蕭秉君房繇是穀梁春秋有尹胡申章房氏之學張蒼爲北平侯及梁太傅賈誼京兆尹張敞太中大夫劉公子皆脩春秋左氏傳誼爲左氏傳訓故授趙人貫

公爲河間獻王博士子長卿爲蕩陰令

蕩陰河內縣也蕩音湯

授

清河張禹長子

非成帝師張禹也

禹與蕭望之同時爲御史數

爲望之言左氏望之善之上書數以稱說後望之爲太

子太傅薦禹于宣帝徵禹待詔未及問會疾死授尹更

始

禹先授更始

傳子咸及翟方進胡常常授黎陽賈護季君

哀帝時待詔爲郎授蒼梧陳欽子佚以左氏授王莽至

將軍而劉歆從尹咸及翟方進受繇是言左氏者本之

賈護劉歆

王吉兼通五經能爲騶氏春秋以詩論語教授好梁邱

賀說易令子駿受焉漢興傳齊論者王吉少府宋畸

居宜

切御史大夫貢禹尚書令五鹿充宗膠東庸生唯王陽

名家

王吉字子陽故謂之王陽

傳魯論詩者常山都尉龔奮長信少

府夏侯勝丞相韋賢魯扶卿前將軍蕭望之安昌侯張禹皆名家張氏最後而行於世吉位至諫大夫

董仲舒少治春秋孝景時爲博士下帷講誦弟子傳以久次相授業或莫見其面蓋三年不窺園其精如此位



至膠西相

薛廣德以魯詩教授楚國龔勝舍師事焉位至御史大夫

疏廣字仲翁少好學明春秋家居教授學者自遠方至位至太子太傅

韋賢爲人質朴少欲篤志於學

篤厚也

兼通尚書以詩教

授號鄒魯大儒位至丞相

後漢劉昆少好習禮容平帝時受施氏易於沛人戴賓

王莽世教授弟子嘗五百餘人每春秋享射嘗備列典

儀以素木瓠葉爲俎豆桑弧蒿矢以射菟首

詩小雅瓠葉詩序曰

刺幽王棄禮而不能行故思古人之不微薄廢禮焉詩曰幡幡瓠葉采之亨之君子有酒酌言嘗之有菟斯首魚之燔之君子有酒酌言獻之昆懼禮之廢故引以瓠葉爲俎實射則歌菟首之詩而爲節也每有行

禮縣宰輒率吏屬而觀之王莽以昆多聚徒衆私行大

禮有僭上心乃繫昆及家屬於外黃獄尋莽敗得免旣

而天下大亂昆避難河南負犢山中

郡國志河南郡有負犢山

建武

五年舉孝廉不行遂逃教授於江陵光武聞之卽除爲

江陵令子軼字君文傳昆業門徒亦盛

注

音圭

丹字子玉世傳孟氏易至王莽時嘗避世教授專

志不仕徒衆數百人建武初爲博士作易通論七篇世

號注君通

雒陽鴻

姓雒陽名鴻也

以孟氏易教授有名稱位少府

任安字定祖廣漢綿竹人也少遊太學受孟氏易兼通  
數經又從同郡楊厚學圖讖究極其術時人稱曰欲知  
仲桓問任安又曰居今行古任定祖學終還家教授諸

生自遠而至除博士不就

伏湛更始立爲平原太守時倉卒兵起天下驚擾而湛獨晏然教授不廢

伏恭湛之兄子也太常試經第一拜博士遷常山太守敦修學校教授不輟繇是北州多爲伏氏學

任末字叔本蜀郡繁人

繁縣故城在今益州新繁縣北

少習齊詩遊京

師教授十餘年爲郡功曹以病免

薛漢字公子淮陽人世習韓詩教授嘗數百人建武初

爲博士當世言詩者推漢爲長

杜撫字叔和捷爲武陽人也少有高才受業於薛漢定韓詩章句後歸鄉里教授沉靜樂道舉動必以禮弟子千餘人其所作詩題約義通學者傳之曰杜君法云位至公車令

楊仁建武中詣師學習韓詩數年歸靜居教授爲閬中令卒於官

魯恭少習魯詩後拜魯詩博士繇是家法學者日盛

魯丕性沉深好學孳孳不倦遂杜絕交遊不荅候問之  
禮士友嘗以此短之而不欣然自得遂兼通五經以魯  
詩尚書教授爲當世名儒後歸郡爲督郵功曹所事之  
將無不師友待之

曹褒父充持慶氏禮傳褒又傳禮記四十九篇教授諸  
生千餘人慶氏學遂行於世褒位至侍中

鮑永少有志操習歐陽尚書子昱少傳父學客授於東

平

馮豹好儒學以詩春秋教麗山下鄉里爲之語曰道德彬彬馮仲文位至尚書

桓榮少習歐陽尚書事博士九江朱普普卒榮奔喪九江因留教授徒衆數百人莽敗天下亂榮抱其經書與弟子逃匿山谷雖嘗飢困而講論不輟後復客授江淮間位至太常

范升傳孟氏易以授楊政而陳元鄭衆皆傳費氏易其後馬融亦與其傳融授鄭玄玄作易注荀爽又作易傳

自是費氏興而京氏遂衰位至聊城令

楊政字子行京兆人也少好學從代郡范升受梁邱易善說經書京師爲之語曰說經鏗鏗楊子行教授數百人官至左中郎將

張興習梁邱易以教授建武中舉孝廉爲郎謝病去復歸聚徒後辟司徒馮勤府勤舉爲孝廉稍遷博士永平初遷侍中祭酒十年拜太子少傅顯宗數訪問經術旣而聲稱著聞弟子自遠至者著錄且萬人爲梁邱家宗



著於  
籍錄  
十四年卒於官子鮐傳興業位至張掖屬國都尉

魏滿字叔牙習京氏易教授位至弘農太守

孫期字仲彧濟陰成武人也少爲諸生習京氏易古文  
尚書家貧事母至孝牧豕於大澤中以奉養焉遠人從  
其學者皆執經壟畔以追之司徒黃琬特辟不行

牟融習大夏侯尚書東海王良習小夏侯尚書沛國桓  
榮習歐陽尚書榮世習相傳授東京最盛扶風杜林傳  
古文尚書林同郡賈逵爲之作訓馬融作傳鄭玄注解

繇是古文尚書遂顯於世也

歐陽欵字正思樂安千乘人也自歐陽生傳伏生尚書至欵八世皆爲博士欵爲汝南太守在郡教授數百人濟陰曹魯字伯山從欵受尚書門徒三千人位至諫議大夫子祉河南尹傳父業教授又陳留陳弇字叔明亦授歐陽尚書于司徒丁鴻

牟長少習歐陽尚書拜博士稍遷河內太守免長自爲博士及在河內諸生講學者嘗有千餘人著錄前後萬

人

宋登少習歐陽尚書教授數千人位至潁川太守

張馴少遊太學能講春秋左氏傳以大夏侯尚書教授位至司農

孔僖字仲和自安國以下世傳古文尚書毛詩僖子季彥守其家業門徒數百人僖位至臨晉令

鄭衆傳周官經後馬融作周官傳授鄭玄玄作周官注玄本習小戴禮後以古經校之取其義長者故爲鄭氏

學玄又注小戴所傳禮記四十九篇通爲三禮焉位至  
大司農

楊倫少爲諸生師事司徒丁鴻習古文尚書爲郡文學  
掾去職講授於大澤中弟子千餘人位至大中大夫  
楊實習歐陽尚書哀平之世隱居教授

包咸少爲諸生受業長安師事博士右師細君姓右師習

魯詩論語王莽末去歸鄉里於東海界爲赤舂所得遂  
見拘執十餘日咸晨夜誦經自若賊異而遣之因住東

海立精舍講授位至鴻臚寺卿

魏應字君伯任城人也少好學建武初詣博士受業習  
魯詩閉門誦習不交僚黨京師稱之後歸爲郡吏舉明  
經除濟陰王文學以疾免官教授山澤中徒衆嘗數百  
人後拜五官中郎將應經明行修弟子自遠方至著錄  
數千人

衛宏字敬仲東海人也少與河南鄭興俱好古學初九  
江謝曼卿善毛詩乃爲其訓宏從曼卿受學因作毛詩

序善得風雅之旨於今傳於世後從大司空杜林更受  
古文尚書爲作訓旨時濟南徐巡師事宏後從林受學  
亦以儒顯繇是古學大興位至議郎

董春少好學究極聖旨後還歸立精舍遠方門徒學者  
嘗數百人諸生每升堂講鳴鼓三通橫經捧手請問百  
人追隨上堂難問者百餘人

董鈞字文伯犍爲資中人也習慶氏禮事大鴻臚王臨  
累遷五官中郎將嘗教授百餘人

丁鴻受歐陽尚書於桓榮嗣封陵陽侯開門教授後代  
成封爲少府門下繇是益盛遠方至者數千人彭城劉  
愷北海巴茂九江朱伉皆至公卿

樊儵刪定公羊嚴氏春秋章句世號樊侯學教授門徒  
前後三千餘人弟子潁川李脩九江夏勤皆爲三公

丁恭習公羊嚴氏春秋恭學義精明教授嘗數百人州  
郡請召不應後爲侍中祭酒

周澤字穉都北海安邱人也少習公羊嚴氏春秋隱居

教授門徒嘗數百人位至太常

甄字字長文北海安邱人也清靜少欲習嚴氏春秋教授嘗數百人字傳業子普普傳子承承講授數百人諸儒以承三世傳業莫不歸服之字位至太子少傅

樓望少習嚴氏春秋爲左中郎將教授不倦世稱儒宗諸生著錄九千餘人

程曾受業長安習嚴氏春秋積十餘年還家講授會稽顧奉等數百人嘗居門下著書百餘篇皆五經通難又



作孟子章句爲海西令卒於官

張玄字君夏河內河陽人也少習春秋顏氏兼通數家  
法建武初舉明經補弘農文學遷陳倉縣丞清淨無欲  
專心經書方其講問乃不食終日及有難者輒爲張數  
家之說令擇從所安諸儒皆伏其多通著錄千餘人

李膺爲烏桓校尉以公事免官還居綸氏教授嘗千人

綸氏縣屬潁川郡故  
城今陽城縣是也

李育扶風人也少習公羊春秋州郡請召育到輒辭病

去嘗避地教授門徒數百位尚書令

穎容博學多通善春秋左氏傳師事太尉楊賜初平中避亂荊州聚徒千餘人劉表以爲武陵太守不肯起

謝該字文儀南陽章陵人也善明春秋左氏傳爲世名儒門徒數百千人位至議郎

蔡玄字叔陵汝南南頓人也學通五經門徒嘗千人其著錄者萬六千人徵辟竝不就

賈逵字景伯尤明左氏明帝令逵自選公羊嚴顏諸生

高才者二十人教以左氏

嚴彭祖顏安樂俱受公羊春秋故曰嚴顏之學

與簡

紙經傳各一通

竹簡及紙也

達遷衛士令建初八年乃詔諸

儒選高才生受左氏穀梁春秋古文尚書毛詩繇是四經遂行於世皆拜達所選弟子及門生爲千乘王國郎朝夕受業黃門署學者皆欣欣美慕焉

張酺永平九年明帝爲四姓小侯開學南宮置五經師酺以尚書教授位至司徒

魯丕拜趙相門生就學者嘗百餘人關東號之曰五經

復興魯叔陵

李恂少習韓詩教授諸生嘗數百人位至武威太守

楊康好學嘗在外黃大澤教授門徒

鄧惲理韓詩嚴氏春秋後客居江夏教授後爲芒長免官又避地教授

寒朗好經學通書傳以尚書教授舉孝廉位至清河太守

李章習嚴氏春秋經明教授位至琅琊太守

劉茂習禮經教授嘗數百人位至侍中

索盧放以尚書教授千餘人位至諫議大夫

夏恭習韓詩孟氏易講授門徒嘗千餘人舉孝廉早卒  
鍾皓世善刑律以詩律教授門徒千餘人爲郡功曹後  
公府辟召皆不就

劉淑少好學明五經遂隱居立精舍講授諸生嘗數百  
人位至侍中虎賁中郎將

檀敷舉孝廉連辟公府皆不就立精舍教授遠方至者

嘗數百人桓帝時博士徵不就

王良字仲子東海蘭陵人也少好學習小夏侯尚書王莽時寢病不仕教授諸生千餘人

吳祐爲河間相自免歸家不復仕躬灌園蔬以經書教授

郭林宗博通墳籍以黨事起遂閉門教授弟子以千數劉焉居陽城山積年教授舉賢良方正辟司徒府

董扶字茂安少從師學兼通數經善歐陽尚書又事聘

士楊厚究極圖讖遂至京師遊覽太學還家講授

廖扶博習韓詩歐陽尚書教授嘗數百人州郡公府辟  
召皆不應就

摯恂以儒術教授隱于南山不應徵聘名重關西馬融  
從其遊學博通經籍

馬融才高博洽爲世通儒教養諸生嘗有千數涿郡盧  
植北海鄭玄皆其徒也弟子以次相傳鮮有入其室者  
融位議郎

鄭玄北海人也造太學受業師事京兆第五元先始通  
京氏易公羊春秋又從東郡張恭祖受周官禮記左氏  
春秋韓詩古文尚書因涿郡盧植事扶風馬融融門徒  
四百餘人升堂進者五十餘生玄自遊學十餘年乃歸  
鄉里家貧耕於東萊學徒相隨已數百人靈帝末弟子  
河內趙商等自遠方至者數千徵大司農不就

盧植少與鄭玄俱事馬融能通古今好學研精而不守  
章句學終辭歸闔門教授位至尚書



皇甫規拜郎中託疾免歸以詩易教授門徒三百餘人  
積十四年

賈洪字叔業京兆新豐人也好學有才而特精於春秋  
左氏傳建安初付郡舉計掾應州辟州中自叅軍以下  
百餘唯洪與馮翊嚴苞交通材學最高洪歷守三縣令  
所在輒開除廩舍親授諸生

蔡衍少明經講授以禮讓化鄉里仕至議郎

張真陷黨罪禁錮時禁錮者不能守靜或死或徙真閉

門不出養徒千人著尚書記難三十餘萬言位至太常

趙典少篤行隱約

隱猶靜也約儉也

博學經書弟子自遠方至

典學孔子七經河圖雒書內外藝術靡不貫綜受業者百有餘人

位至尚書令

魏國淵字子尼師事鄭玄後與邴原管寧等避亂遼東淵篤學好古在遼東嘗講學於山巖士人多推慕之繇是知名

邴原字根矩北海人黃巾之難避地遼東積十餘年自反國土於是講述禮樂吟詠詩書門徒數百服道數十

時鄭玄以博學洽聞注解典籍故儒雅之士集焉原亦以高遠清白願志澹泊口無擇言身無擇行故英偉之士向焉是時海內清議云青州有邴鄭之學

吳虞翻爲騎都尉翻性疏直數有酒失坐徙交州雖處罪放而講學不倦門徒嘗數百人

徵崇河南人隱於會稽躬耕以求其志好尚者從學所教不過數人輒止欲令其業必有成也

闕澤州里先輩丹陽唐固亦修身積學稱爲儒者著國

語公羊穀梁傳注講授嘗數十人位至中書令侍中太子太傅

晉續咸字孝宗爲劉琨并州從事中郎性孝謹敦重履道貞素好學師事京兆杜預專以春秋鄭氏易教授嘗數十人博覽群言高才善文論

宋纖燉煌劾穀人也隱居於酒泉南山明究圖緯弟子受業三千餘人後前涼張祚徵爲太子太傅

杜夷博覽百家筭歷圖緯靡不畢究寓居汝潁之間十

載足不出門年四十餘始還鄉里閉門教授生徒千人  
位至國子祭酒

皇甫謐字士安博綜典籍沉靜寡欲有高尚之志故終  
身不仕門人摯虞張軌牛綜席純皆爲晉名臣

南齊劉瓛少篤學博通五經聚徒教授嘗有數十齊武  
陵王暉爲會稽太守太祖欲令瓛爲暉講除會稽郡丞  
學徒從之轉衆瓛姿狀纖小儒學冠於當時京師士子  
貴遊莫不下席受業性謙率通美不以高名自居遊詣

故人唯一門生持胡床隨後主人未通便坐問答住在檀橋瓦屋數間上皆穿漏學徒敬慕不敢指斥呼爲青溪竟陵王子良親往修謁七年表世祖爲巖立館以楊烈橋故主第給之生徒皆賀巖曰室美豈爲人哉此華宇豈吾宅哉幸可詔作講堂猶恐見害也未及徙居遇病子良遣從巖學者彭城劉繪順陽范績將厨於巖宅營齋及卒門人受學竝弔服臨送

樓幼瑜字季玉亦聚徒教授不應徵辟

吳苞字天蓋濮陽鄆城人也儒學善三禮及老莊宋泰始中過江聚徒教學冠黃葛巾竹麈尾蔬食二十餘年隆昌元年詔曰處士濮陽吳苞棲志窮谷秉操貞固沉靜味古白首彌厲徵太學博士不就始安王遙光右衛江柘於蔣山南爲立館學者咸歸之以壽終

沈麟士字雲禎隱居餘不吳差山講經教授從學者數十百人各營屋宇依止其側麟士重陸機連珠每爲諸生講之

梁周弘正累遷國子博士時於城西立士林館弘正居以講授聽者傾朝野焉

王承爲中書門下侍郎兼國子博士時膏腴貴遊咸以文學相尚罕以經術爲業唯承獨好之發言吐論造次儒者在學訓諸生述禮易義

張綰爲豫章內史綰在郡述制旨禮記正言義四姓衣冠士子聽者嘗數百人入爲御史中丞大同末城西開士林館聚學者綰與右衛朱异太府卿賀琛遞述制旨



禮記中庸義

賀瑾爲國子博士於學講授生徒嘗數百人

沈峻博通五經傳峻業者有吳郡張及會稽孔子雲官  
皆至五經博士

賀瑒爲步兵校尉領五經博士瑒於禮尤精館中生徒  
嘗數百弟子明經對策至數十人

諸葛瓊琅琊人也居京口瓊性勤於訓誘後生就學者  
日至居宅狹陋無以容之太守張友爲起講舍

虞僧誕會稽人以左氏教授聽者亦數百人其該通義例當時莫及

伏曼容初爲宋中散大夫宅在瓦官寺東曼容施高坐於廳事有賓客輒升高坐爲講說生徒數十百人

卞華字昭邱爲安成王功曹叅軍兼五經博士聚徒教授華博涉有機辨說經析理爲當時之冠

何佟之爲國子博士永元末京師兵亂佟之嘗集諸生講論孜孜不怠

孔子祛初爲長沙嗣王侍郎兼國子助教講尚書四十  
九篇聽者嘗數百人

皇侃爲國子助教於學講說聽者數百人

許懋字昭哲少孤好學爲州閭所稱十四入太學受毛  
詩旦領師說晚而覆講坐下聽者嘗數百人仕至中庶  
子

陳袁憲字德章尚書左僕射樞之弟也幼聰敏好學有  
雅量梁武帝修建庠序別開五館其一館在憲宅西憲

嘗招引諸生與互談論每有新義出人意表同輩咸嗟服焉後入隋爲晉王府長史

戚衮年十九梁武帝勅策孔子正言并周禮禮記義衮對高第仍除揚州祭酒從事史就國子博士宋懷方質儀禮義懷方北人自魏攜儀禮禮記疏秘惜不傳及將亡謂家人曰吾死後戚生若赴便以儀禮禮記義本付之若不來卽宜隨屍而殯爲儒者推許如此

沈德威爲太學博士轉國子助教每自學還私室以講

授道俗受業者數百人率皆如此

王元規遷南平王府限內叅軍王爲江州元規隨府之鎮四方學徒不遠千里來請道者嘗數十百人爲國子助教東宮學士自梁代諸儒相傳爲左氏學者皆以賈逵服虔之義難駁杜預凡一百八十條元規引証通析無復疑滯每國家議吉凶大禮常叅預焉

孫瑒鎮郢州嘗於山齋設講肆集玄儒之士冬夏資奉爲學者所稱

張譏性恬靜不求榮利嘗慕閒逸所居宅營山池植花果講周易老莊而教授焉吳郡陸元朗朱孟博一乘寺沙門法才法雲寺沙門惠休至貞觀道士姚緩皆傳其業位至東宮學士

後魏劉模爲中書博士與李彪爲寮竝相愛好至於訓導國胄甄明風範遠不及彪也

索敞字巨振以儒學見拔爲中書博士篤勤訓授肅而有禮京師大族貴遊之子弟皆敬憚威嚴多所成益位

至尚書牧守者數十人皆受業於敞敞遂講授十餘年  
馮元興魏郡肥鄉人學通禮傳有文才年三十三還鄉  
教授嘗數百人

李郁爲國子博士自國學之建諸博士率不講說朝夕  
教授唯郁而已謙虛寬雅甚有儒者之風

劉昞字延明燉煌人父寶以儒學稱昞年十四就博士  
郭瑀學瑀弟子五百餘人通經業者八十餘人

高允博通經史爲征南從事中郎府解還家教授受業

者千餘人

李曾趙郡人孝伯之父也曾少治鄭氏禮左氏春秋以教授爲業

劉蘭武邑人性聰敏讀左氏五曰一遍兼通五經先是張吾實以聰辯過人其所解說不本先儒之旨唯蘭推經傳之繇本注者之意叅以緯候及先儒舊事甚爲精悉自後經義審博皆繇於蘭蘭又明陰陽博物多識故爲儒者宗瀛州刺史裴植徵蘭講書於州城南館植爲



學主故生徒甚盛海內稱焉又特爲中山王英所重英引在館令教其子熙誘畧等蘭學徒前後數千成業者衆

北齊張思伯河間樂城人也善說左氏傳爲馬敬德之次撰刊例十卷行於時亦治毛詩章句以二經教授齊安王廓武平初爲國子博士

鮑季詳從弟長暄兼通禮傳武平末爲任城王潛丞相掾嘗在京教授貴遊子弟齊亡後歸鄉里講經卒於家

張買奴平原人經義該博門徒千餘人諸儒咸推重之名聲甚盛歷太學博士國子助教

後周樂遜爲太學博士治小師氏下大夫自譙王儉以下竝行束脩弟子之禮遜以經術教授甚有訓導之方武帝保定中頻加賞賜遷遂伯中大夫詔魯公與畢公賢等俱以束修之禮同受業焉天和中出爲湖州刺史秩滿還朝拜皇太子諫議復在露門教授皇子增邑一百戶

樊深講習五經爲于謹府叅軍事令在館教授子孫  
熊安生長樂阜城人專以三禮教授弟子自遠方至者  
千餘人乃討論圖緯摺撫異聞先儒所未悟者皆發明  
之齊河清中陽休之特奏爲國子博士安生旣學爲儒  
宗當時受其業擅名于後者有馬榮伯張黑奴竇士榮  
孔籠劉焯劉炫等皆其門人焉

隋何妥爲國子博士出爲龍州刺史時有負笈遊學者  
妥皆爲講說教授之

房暉遠治三禮春秋三傳詩書周易嘗以教授爲務遠方負笈而從者動以千計南陽王綽爲定州刺史聞其名召爲博士

蕭該篤學尤精漢書包愷兄愉明五經愷傳其業又從王仲通受史記漢書尤稱精究大業中爲國子助教于時漢書學者以蕭包二人爲宗聚徒教授著錄者數千人卒門人爲起墳立碣焉

馬光爲太學博士初教授瀛博間門徒千數至是多負

笈從入長安

劉焯信都昌亭人以儒學知名舉秀才射策甲科直門下省俄除員外將軍與楊素牛弘等於國子共論古今滯義後因國子釋奠與劉炫二人論議深挫諸儒諸儒或懷妬恨遂爲飛章所謗除名爲民於是優遊鄉里專以教授著述爲務孜孜不倦然懷抱不曠又嗇於財不行束修者未嘗有所教誨時人以此少之


劉炫河間人與著作郎王邵同修國史俄直門下省兼

於內史省考定群言炫雖遍直三省竟不得官後除殿內將軍坐事除名歸于家以教授爲務

王孝籍以博覽群言徧治五經開皇中召入秘書助王邵脩國史邵不之禮在省多年而不免輸稅孝籍奏於吏部尚書牛弘弘亦知其學業而竟不得調後歸鄉里以教授爲業終于家

唐秦暉字仁先晉陵無錫人也明尚書春秋兼通史傳隋煬帝召爲秘書直學士後還家以講授爲務

王方慶年十六爲趙王府行叅軍嘗就記室任希古受  
史記漢書能盡其業



册府元龜卷五百九十八